



Ka Eke ki Wairaka

Ko te arotahinga o tēnei kōwae ako, ko ētahi o ngā kaupapa ka ara ake i te waiata aroha *Ka Eke ki Wairaka*. He mea tuhi hei tautoko i ngā mahi whakaako me ngā mahi ako i te taumata 3 me te 4 o Te Marautanga o Aotearoa.

Ka Eke ki Wairaka

He mea tito nā Puhiwahine

Ka eke ki Wairaka ka tahuri whakamuri
Kāti ko te aroha te tiapu i Kakepuku
Kia rere arorangi te tihi ki Pirongia
Kei raro koe Toko taku hoa tungāne

Nāku anō koe i huri ake ki muri
Mōkai te ngākau te whakatau iho
Kia pōruatia e awhi-ā-kiri ana
Kotahi koa koe i mihia iho ai
Ko taku tau whanaunga nō Toa i te tonga
Nō Mania i te uru ka pēa tāua
I ngākau nui ai he mutunga mahi koe

Kāti au ka hoki ki taku whenua tupu
Ki te wai koropupū i heria mai nei
I Hawaiki rā anō e Ngātoroirangi
E ōna tuāhine Te Hoata Te Pupū

E hū rā i Tongariro, ka mahana i taku kiri
Nā Rangi mai anō nāna i mārena
Ko Pihanga te wahine ai ua ai hau
Ai marangai ki te muri e
Kōkiri

Whakarongo



Te Whāinga Matua

He ako tahi, he āta tiro tiro tahi i te mōteatea *Ka Eke ki Wairaka* me ngā ākonga.

Ngā Koronga Ako

E ako ana ngā ākonga:

- I te waiata aroha *Ka Eke ki Wairaka*.
- Ki te tūhura i te reo o roto i *Ka Eke ki Wairaka*.
- Ki te hāpai i te toi ataata hei whakaatu i ētahi kaupapa kei te waiata nei e mau ana.

Whakarongo

Ngā mea e hiahiatia ana

- *Ko Wai – Ka Eke ki Wairaka* – te mōteatea tāoreore me te kōnae oro
- He pūrere tuku raraunga, he papamā pāhekoheko rānei
- He tauira o HE RĀRANGI KUPU-A1.PDF (ki te hiahia koe)

Ngā mahi

Akoranga ā-akomanga.

- Whakatangihia te kōnae oro o *Ka Eke ki Wairaka*. Tonoa ō ākongā kia kati i ō rātou whatu i a rātou e whakarongo ana ki te waiata.
- Pātai atu me he whakaaro, he kare ā-roto rānei e toko ake ana i a rātou ki te waiata nei.

He aha ngā mea i rongo ai rātou i roto i te waiata?

Ētahi whakautu tērā ka ara ake:

I rongo au i ngā ingoa o ētahi maunga – a Pirongia, a Tongariro.

I rongo au i ētahi ingoa atua, ingoa tupuna, pērā i a Rangī, i a Ngātoroirangi.

Anei he whakamārama hei tuku māu ki ō ākongā:

He waiata aroha a *Ka Eke ki Wairaka*. I tuhia e tētahi wahine ko Puhīwahine te ingoa, i ngā tau tuatahi o ngā 1840. I tae a Puhīwahine ki Whatiwhati, ā, i reira ka tūtaki ia ki a Mahutu Te Toko. Hei karanga tungāne te tangata nei ki a ia. Ka riro te ngākau o Puhīwahine i a Te Toko. E ai ki te kōrero, he tangata purotu, he rōreka ki te waiata, he pūkōrero anō. Kua piri kē te tokorua nei ki a rāua anō mō ētahi rangi, kātahi anō ka mōhio te whānau o Puhīwahine. Kāore rātou i pai kia moe rāua. Kahakina atu ana a Puhīwahine, whakahokia atu ana ki te takiwā o Taupō. Me te aha, ngau kino ana te aroha, te pōuri i roto i a Puhīwahine. Koia tēnei, ko te take i titoa ai e ia tāna waiata aroha.

- Tukua anō a *Ka eke ki Wairaka* kia rere, engari ko ngā whiti tuatahi e rua anahe. Whakaataria anō ngā whakaahua e hāngai ana. Tonoa ngā ākongā kia āta whakarongo ki ngā kupu, kia āta tiro tiro anō i ngā whakaahua.
- I muri i te whakarongo ki te whiti tuatahi, ka ohia manomano te akomanga i ngā kupu, i ngā whakaahua i puta ake. Tuhia he rārangi hei whakairi ki te pakitara, ki hea ake rānei o te akomanga.
- Tukuruatia tēnei mahi mō ērā atu whiti. Anei pea ētahi whakautu ka ara ake mō ngā whiti:

Te whiti tuatoru	Te whiti tuarua	Te whiti tuatoru	Te whiti tuawhā
eke	mōkai	hoki	hū
Wairaka	ngākau	whenua tupu	mahana
tahuri	tonga	wai koropupū	kiri
tiapu	uru	heria	tongariro
Kakepuku	pōruatia	Hawaiki	Rangi
rere	awhi	Ngātoroirangi	mārena
arorangi	pea	tuāhine	Pihanga
tihi	whanaunga	Te Hoata	ua
Pirongia	Toa	Te Pupū	hau
Toko	Mania		marangai

Tūhuratia ngā kupu o te waiata

- Whakarōpūngia ngā ākonga. Ka whiriwhiri, ka rangahau ia rōpū i tētahi o ngā rārangi kupu, me te whakatakoto i ēnei kōrero mō ia kupu:
 1. Tētahi whakamārama/whakamāoritanga o te kupu.
 2. He kupu taurite – kia kotahi, nui ake rānei.
 3. Hei tauira o te kupu i te rerenga kōrero.
 4. He horopaki tērā e rangona ai te kupu.
 5. Te whakahaere whakaari charade nei hei whakaatu ā-tinana i te tikanga o te kupu.

Tāia ngā rārangi kupu nei, ko āu ake rārangi rānei, hei wherawhera mā ngā rōpū, (HE RĀRANGI KUPU-A1.PDF).

Me he ingoa tūturu te kupu, tonoa rātou kia whakatakoto pārongo atu anō mōna. Hei tauira, mō Pihanga: *He maunga a Pihanga e tata ana ki Tongariro. Ko ia te wahine a Tongariro.*

Whakaūngia ngā mea e ākona ana

Ngā mea e hiahiatia ana

- He tauira o RAUPAPATIA NGĀ KUPU-A1.PDF
- He tauira o RAUPAPATIA NGĀ RĀRANGI-A1.PDF

Ngā mahi

- Whakamahia ngā rārangi kupu matua, ko te RAUPAPATIA NGĀ KUPU-A1.PDF rānei. Mā ngā ākonga e tapahi ngā pepa kia noho ai he kupu kotahi ki ia tapahanga. Riwhiriwhia kia hē te raupapa. Ko tā rātou, he whakatika i te raupapa. Ko te mahi tuatahi, he wehewehe ki ngā whiti tika, kātahi ko te aro ki te raupapa tika o ngā kupu i te whiti.
- Tapahia te waiata ki ōna anō rārangi kōrero takitahi. Mā ngā ākonga e whakaraupapa ngā rārangi kōrero (whakamahia te RAUPAPATIA NGĀ RĀRANGI-A1.PDF). Kia rerekē te huinga rārangi kōrero e hoatu ki tēnā, ki tēnā rōpū. Kia oti, ka hui tahi anō te akomanga, ā, ka whakaatu ia rōpū i tāna i mahi ai.

He Rārangi Kupu

<p>1</p> <p>eke Wairaka tahuri tiapu Kakepuku rere arorangi tihi Pirongia Toko</p>	<p>2</p> <p>mōkai ngākau tonga uru pōruatia awhi pea whanaunga Toa Mania</p>
<p>3</p> <p>hoki whenua tupu wai koropupū heria Hawaiki Ngātoroirangi tuāhine Te Hoata Te Pupū</p>	<p>4</p> <p>hū mahana kiri Tongariro Tangi mārena Pihanga ua hau marangai</p>

Raupapahia ngā kupu

eke	mōkai
Wairaka	ngākau
tahuri	tonga
tiapu	uru
Kakepuku	pōruatia
rere	awhi
arorangi	pea
tihi	whanaunga
Pirongia	Toa
Toko	Mania
hoki	hū
whenua tupu	mahana
wai koropupū	kiri
heria	Tongariro
Hawaiki	Rangi
Ngātoroirangi	mārena
tuāhine	Pihanga
Te Hoata	ua
Te Pupū	hau
	marangai

Raupapahia ngā rārangi

Ka Eke ki Wairaka — *nā Puhiwahine e tito*

Ka eke ki Wairaka ka tahuri whakamuri

Kāti ko te aroha te tiapu i Kakepuku

Kia rere arorangi te tihi ki Pirongia

Kei raro koe Toko taku hoa tungāne

Nāku anō koe i huri ake ki muri

Mōkai te ngākau te whakatau iho

Kia pōruatia e awahi ā-kiri ana

Kotahi koa koe i mihia iho ai

Ko taku tau whanaunga nō Toa i te tonga

Nō Mania i te uru ka pea tāua

I ngākau nui ai he mutunga mahi koe

Kāti au ka hoki ki taku whenua tupu

Ki te wai koropupū i heria mai nei

I Hawaiki rā anō e Ngātoroirangi

E ōna tuāhine Te Hoata Te Pupū

E hū rā i Tongariro, ka mahana i taku kiri

Nā Rangi mai anō nāna i mārena

Ko Pihanga te wahine ai ua ai hau

Ai marangai ki te muri e

Kōkiri

Ngā Huakiwa



- Tukua anō a *Ka Eke ki Wairaka* kia rere. Tonoa ngā ākonga kia arotahi ki ngā whakaahua. Matapakia te whakanoho a te ringatoi i ētahi whakaahua ki runga ake i ētahi, me tana whakamahi i ngā huakiwa me ngā whārangi pūataata hei taki i te kōrero.
- Mō tēnei mahi, ka kōwhiria e te ākonga he kupu, he rārangi rānei mai i te waiata, koia hei hiringa whakaaro mō tētahi whakaahua huakiwa.

Ngā mea e hiahiatia ana

- He kāri pango
- He kāmera, he pūreretā
- He māripi haratau
- He kāpia

Ngā mahi

- Ka kōwhiri te ākonga i tētahi kupu, rārangi rānei o roto mai i te waiata.
- Ka mahi takirua ngā ākonga ki te ohia manomano i ngā whakaahua ka toko ake i a rāua e whiriwhiri ana i ā rāua kupu/rārangi.

Hei tauira: TONGARIRO – puia, hukarere, maunga, Ketetahi, Pihanga, Ngātoroirangi, Tūwharetoa.

- Ka whakaahua (ā-kāmera) ngā ākonga i a rātou anō e whakaata ana, e whakaari ana i ā rātou kupu/rerenga. Kia āta whai whakaaro ngā ākonga ki ēnei āhuetanga:
 - ngā āhua e taea ana e rātou te whakaata ki ō rātou tinana tonu
 - te wāhi ‘tōrarō’ – te wāhi ka tapahia atu
 - te aronga – ko mua, ko muri rānei
 - kia pēhea te tawhiti o te whakaahuetanga – me tūtata, me tūwaenga rānei, me whakaahua whānui rānei
 - he aha kei te tuarongo.
- Ko te māripi haratau hei āta tapahi mai i ngā wāhanga o te whakaahua ka noho koirā te wāhanga huakiwa.
- Ka whakapiria atu te whakaahua ki te kāri pango. Mehemea i āta tapahia mai te wāhanga ‘tōrarō’, tērā ka taea taua/aua wāhanga te whakapiri atu ki tētahi atu kāri, ki tētahi atu tuarongo rānei.

Te Whakaatu me te Mātakitaki



- Ka whakaaturia e te ākonga āna mahi toi ki tētahi rōpū iti, ki te akomanga rānei.
- Ka whakaputa whakaaro te ākonga ki ngā mahi toi a ērā atu. Ka tuku pātai, ka whakaatu he aha ki ōna whakaaro te mea e whakaataria ana i ngā mahi toi a ana hoa, he aha ngā mea pai i ngā mahi a ērā atu, ā, he aha ngā kare ā-roto i pupū ake i a ia i tana kite i aua mahi.
Ka whakapuaki hoki te ringatoi i ōna ake whakaaro ki tāna mahi toi.

Kupu tāpiri

Ka taea te whakamahi whārangi mai i ngā moheni, hei aha ngā whakaahua ā-kamera.

Te Ako i *Ka Eke ki Wairaka*

Ako ā-kākā

Tāia ngā kupu o te waiata, whakamahia rānei te tauira oro o te mōteatea, (KA EKE KI WAIRAKA.PDF).

- Ko te mahi iāianā, ko te ako i ngā whiti e whā o *Ka Eke ki Wairaka*.
- Ka noho tōpū pea te akomanga ki te ako, ka noho rānei ki ōna anō rōpū iti. Kia mau pū ngā kupu o tētahi whiti, ka haere ai ki te mea ka whai ake. Ā, kei wareware ngā whakaahua kei te rauemi matihiko mō *Ka Eke ki Wairaka* – he āwhina kei reira e mau pū ai ngā kupu ki te whatumanawa.

Ngā Mahi a ngā Tūpuna

Ngā mea e hiahiatia ana

- He tārua o NGĀ MAHI A NGĀ TŪPUNA-A1.PDF me NGĀ MAHI A NGĀ TŪPUNA-PAPATAU-A1.PDF (kia 1 mā ia ākongā)
- He pēne whītau, pene rākau kano rānei
- He kutikuti

Ngā mahi

- Tohaina ngā tārua o NGĀ MAHI A NGĀ TŪPUNA-PAPATAU-A1.PDF ki ngā ākongā.
- Āta pānuihia ngā rerenga kōrero e iwa nei ki ngā ākongā.

**Ka eke ki Wairaka ka tahuri whakamuri
Kei raro koe Toko ko taku hoa tūngāne
Ko taku tau whanaunga nō Toa i te tonga**

**Kāti au ka hoki ki taku whenua tupu
I Hawaiki rā anō e Ngātoroirangi
E hū rā i Tongariro, ka mahana i taku kiri**

**Nā Rangi mai anō nāna i mārena
Ko Pihanga te wahine ai ua ai hau
Ai marangai ki te muri ē ... Kōkiri**

- Tonoa ngā ākongā kia tā pikitia tere mō ia rerenga kōrero ki roto i ngā pouaka o te papatau i a koe e pānui ana. Kātahi ka tapahia ngā pikitia nei ki ōna wāhanga e iwa.
- Kua raua ngā rerenga kōrero e iwa (i tapahia mai i te tāruatanga matua) ki roto kōpaki. Tohaina kia kotahi anō te kōpaki me ngā rerenga kōrero kua pānuitia (NGĀ MAHI A NGĀ TŪPUNA-A1.PDF), ki ia ākongā.
- Kātahi ka honoa ngā rerenga kōrero (1–9) ki raro i te pikitia e tika ana.
- Ka matapakia takiruatia ngā mahi.

Ka Eke ki Wairaka

Nā Puhiwahine e tito

Ka eke ki Wairaka ka tahuri whakamuri
Kāti ko te aroha te tiapu i Kakepuku
Kia rere arorangi te tihi ki Pirongia
Kei raro koe Toko taku hoa tungāne

Nāku anō koe i huri ake ki muri
Mōkai te ngākau te whakatau iho
Kia pōruatia e awahi-ā-kiri ana
Kotahi koa koe i mihia iho ai
Ko taku tau whanaunga nō Toa i te tonga
Nō Mania i te uru ka pēa tāua
I ngākau nui ai he mutunga mahi koe

Kāti au ka hoki ki taku whenua tupu
Ki te wai koropupū i heria mai nei
I Hawaiki rā anō e Ngātoroirangi
E ōna tuāhine Te Hoata Te Pupū

E hū rā i Tongariro ka mahana i taku kiri
Nā Rangi mai anō nāna i mārena
Ko Pihanga te wahine ai ua ai hau
Ai marangai ki te muri e
Kōkiri

Ngā mahi a ngā tūpuna

Ka eke ki Wairaka ka tahuri whakamuri

Kei raro koe Toko ko taku hoa tūngāne

Ko taku tau whanaunga nō Toa i te tonga

Kāti au ka hoki ki taku whenua tupu

I Hawaiki rā anō e Ngātoroirangi

E hū rā i Tongariro ka mahana i taku kiri

Nā Rangi mai anō nāna i mārena

Ko Pihanga te wahine ai ua ai hau

Ai marangai ki te muri ē ... Kōkiri

Ngā Mahi a ngā Tūpuna

He Huatau Aromatawai

E āhei ana te ākongā:

- Te waiata i te mōteatea *Ka Eke ki Wairaka*.
- Te waihanga i tētahi mahi toi e whakaahua ana i tētahi rerenga kōrero o te mōteatea.
- Te whakaatu i tāna mahi toi ki ōna hoa.
- Te whakaputa whakaaro, te whakarongo hoki ki ngā kōrero a ētahi atu mō ngā mahi toi (ā rātou ake, ā ngā hoa anō).

Ngā Kaitito Wahine



Te Whāinga Matua

He rangahau i ētahi kaitito wahine o tō mātou iwi.

Ngā Koronga Ako

E ako ana te ākongā:

- Ki te rangahau, ki te whakaatu pārongo mō Puhīwahine, mō tētahi wahine tito mōteatea rānei o tōna ake iwi, e ora ana i te 100 tau, nui ake rānei ki muri.
- Ki te tuku pārongo mā tētahi whakaaturanga ataata, oro-ataata rānei.

Ngā Kaitito Wahine

Ngā mea e hiahiatia ana

- He hononga ki te ipurangi
- He mihini hopu reo

Ngā mahi

Ngā kaitito o mua

Arā atu ngā wāhine toa ki te tito mōteatea. I roto i ōna kohikohinga waiata o *Ngā Mōteatea* ka kī ake a Tā Apirana Ngata ko te nuinga o ngā kaitito he wāhine. Ko tāna meatanga tērā ki ngā tauira reo Māori kia ruku rātou ki ngā waiata nei kātahi ka kitea te wairua ake o te mana wahine.

Kei ngā waiata hoki ngā kōrero ā-iwi, ngā kōrero tuku iho, ngā tohu whenua, ngā kōrero tōrangapū ā-iwi. He tohu tēnei ki te tohunga o te wahine Māori ki te whakaheke kōrero. Ko tētahi kaitito rongonui o te rautau 1800 ko Puhiwahine o Ngāti Tūwharetoa me Ngāti Maniapoto. E ai ki a Pei Te Hurinui ka rongō i ōna waiata he wahine mātau ia ki ngā kōrero, ngā whakapapa me ngā tohu whenua o tōna iwi; i āta whai whakaaro ia ki ngā tāpaetanga whenua o tōna iwi, me tana whakaōhiti ki tōna iwi kia tūpatō ki ngā āhua o te Kāwana me te whakawai o te reti.¹

- He mahi rangahau tēnei. Ka rangahaua e te ākongā a Puhiwahine, tētahi wahine Māori rānei o tōna iwi (te iwi kāinga rānei o te rohe e noho nei ia) he kaitito waiata, ā, e ora ana ia i te kotahi rau tau, nui ake ki muri.
- Mā te akomanga nui tonu e rangahau ko wai mā ngā kaitito ka uru ki tēnei karangatanga. Mai i tēnei rōpū kaitito wahine Māori, ka kōwhiria e ia ākongā tētahi e whakapapa atu ana, e āta whai hononga atu ana ia.
- Ka hanga kōnae rangahau te ākongā. Ka kohia ngā kōrero, ngā whakaahua, tae atu ki ngā kōnae oro, ataata, kiriata, e whakaaro ana ia kei te hāngai, kei te whai kiko. Me tuhi anō e ia kia rima, neke atu rānei ngā pātai hei arotahinga mō tana rangahau. Anei ngā momo pātai pai:
 - I hea ia e noho ana? I mate mai ia ki hea?
 - Ko wai ōna iwi, ōna hapū?
 - He pēhea tōna āhua ki te titiro atu?
 - He pēhea te āhua o tana noho ki te ao?
 - He aha te/ngā waiata i titoa rā e ia?
 - He aha ngā momo whakaaro/kaupapa i kōrerotia e ia i roto i tāna/āna mōteatea? He aha te take koinā tana/ana kaupapa kōrero?

Anei ētahi puna āwhina:

- Te pae tukutuku o Te Ara
- Ngā Mōteatea
- Ngā Tāngata Taumata Rau
- Ka tīpakona e te ākongā tētahi o ngā mōteatea i titoa e te wahine kua kōwhiria rā e ia. Ka kimiha ngā kupu o te waiata, me tētahi hopukanga oro o te waiata (māna tonu rānei te waiata e hopu i te wā e waiatatia ana e ētahi).

¹ Rawinia Higgins rāua ko Paul Meredith. 'Te mana o te wāhine – Māori women - Waiata, karanga and whaikōrero', Te Ara - the Encyclopedia of New Zealand, updated 30-May-14

- Nā runga i ngā kōrero rangahau kua whakaemitia, ka tū ake ia ākongā ki te kōrero ki te akomanga mō tana kaitito – kia kau e roa ake i te rua meneti ki tēnā, ki tēnā o ngā whakaaturanga nei. E hāra i te mea me tuhi kauhau rawa – he whakawhiti pārongo noa tēnei mō te wahine tito mōteatea kua kōwhiria.
- Me whakahaere pea e te pouako tētahi patapatainga i muri i ngā whakaaturanga e 4, he tuku pātai, he whakautu pātai anō te mahi a ngā ākongā e pā ana ki aua kaitito kātahi tonu ka kōrerotia. Kia haere anō ētahi whakaaturanga e whā, ka tū anō ko te patapatainga mō aua kaitito.

He Pakipūmeka

Mātākihia tēnei whakaaturanga o *Iwi Anthems* – he pakipūmeka i puta i a Whakaata Māori. E kōrero ana a Chris Winitana mō ētahi “anthem” o Ngāti Tūwharetoa, ā, ko *Ka Eke ki Wairaka* tētahi. E pai ana te mātaki i te katoa o te pakipūmeka (26 meneti), ko te wāhanga noa iho rānei ki a *Ka Eke ki Wairaka* (12:50 meneti).

<http://www.maoritelevision.com/tv/shows/iwi-anthems/S01E024/iwi-anthems-series-1-episode-24>

- Nā runga i ngā rangahautanga me ngā kōrero, ngā ataata, ngā oro kua kohia e ia, ka tahuri te ākongā ki te waihangā i tāna ake pakipūmeka mō te kaitito i kōwhiria e ia.
- Ka whakamahia te iMovie, tētahi atu pūmanawa whakatika/whakarākai kiriata rānei, te PowerPoint rānei hei hanga whakaaturanga oro-ataata.
- Kia 2–3 meneti te roa o te pakipūmeka. Ā, ko te tikanga, ka whakautua ngā pātai rangahau i whakatakotoria i te tīmatanga o te mahi nei. Me noho mai anō ēnei mea ki te kiriata:
 - He taitara me ngā whakamihī e tika ana
 - He kōrero e taki haere ana i te pakipūmeka
 - Tētahi hopukanga o te waiata (ētahi wāhanga rānei o te waiata), he whakaahua (whakaahua tū, whakahua nekeneke rānei)
 - Ngā kupu o te waiata.
- Me tuhi papapaki ngā ākongā hei arataki i te mahinga mai o ā rātou kiriata. He pai te papapaki hei tātai i ngā pārongo me ngā whakaahua – he momo mahere hei ārahi i te kohinga o ngā kōrero me ngā mahi whakatikatika, whakapaipai. Ki te kore ō ākongā e tino mōhio ki te whakamahi papapaki, māu e whakatauirā atu. Me whakamahara atu, ko te tuhi tere i te pikitia me te kupu hei āwhina i a rātou ki te whakaraupapa, ki te tātai haere i ngā whakaaro matua o tēnā tapawhā, o tēnā tapawhā o te papapaki.
- Ka noho takirua ngā ākongā. Ka whakaatu tēnā me tēnā i tāna papapaki ki tana hoa. Me whakaputa whakaaro te ākongā ki tana hoa mō tana papapaki. Hei tauira, me mea atu āe, e pai ana tana whai haere i te tāhuhu o ngā kōrero; āe i mārama te hora o ngā whakaaro matua, i pēhea kē rānei.
- Ka whāia e te ākongā tāna papapaki, hei ārahi i te whakaeminga me ngā mahi whakatikatika, whakarākai i te whakaaturanga.
- Ka noho tōpū te akomanga ki te mātaki i ngā pakipūmeka.

Ngā Kaitito o Muri Mai nei

Ngā mea e hiahiatia ana

- Ko Wai – Ka Eke ki Wairaka – te mōteatea tāoreore
- Hononga ki te ipurangi
- He tauira o PAPAPAKI-A2.pdf
- He mihini hopu reo, hopu ataata hoki

Ngā mahi

- Ka whakawhiti whakaaro tahi me ngā ākonga mō ngā wāhine Māori kua tito waiata i te rautau kua pahure ake nei.
Ka haere tonu ngā mahi a ngā kaitito wahine toa i te momo tangata pērā i a Tuini Ngāwai me Ngoingoi Pēwhairangi. I te tekau tau 1980 ka tuhi a Pēwhairangi i ngā waiata rongonui pērā i a 'E Ipo' me 'Poi E' i waiatatia e Tui Teka me te Karapu Māori o Pātea. I ngā tau tīmatanga o te rautau 2000 ko Whirimako Black, rātou ko Moana Maniapoto, ko Maisey Rika mā ērā i whakatairanga ake i te puoro Māori me te mana wahine.² Tae noa mai ki tēnei wā ko Toni Huata rātou ko Majic Paora, ko Ariana Tikao, ko Mina Ripia ētahi o ngā wāhine Māori e tito waiata ana i roto anō i te reo Māori. Heoi anō ko Anika Moa, Bic Runga, Betty-Ann Monga me te huhua tonu o ngā wāhine Māori e tito waiata ana, e waiata ana i roto i te reo Ingarihi.
- Mātākihia anō te ataata o *Ka Eke ki Wairaka*. Kei te YouTube ētahi o ngā ataata waiata a Maisey Rika:
Rūaumoko – <https://www.youtube.com/watch?v=yvFD3aLwZU>
Tangaroa Whakamautai – <https://www.youtube.com/watch?v=yblB87dpJGc>
- Matapakia ngā ataata puoro, me te rite o te ataata o *Ka Eke ki Wairaka* ki tētahi ataata puoro – arā, he waiata e tautokona ana ki ōna anō whakaahua nekeneke. Uia atu tēnei pātai:
He aha ngā āhuatanga e rawe ai tētahi ataata puoro?
- Ka mahi ā-rōpū ngā ākonga. Ka kōwhiria he mōteatea e mōhio ana rātou, kua rangahaua rānei e rātou, ā, ka hangaia he “ataata puoro” mō taua mōteatea.
- Me āta tiro tiro e rātou ngā kupu o te waiata, ka ohia manomano ai i ngā whakaahua tērā ka pai hei hoa mō ngā kupu. Anei ētahi momo mea kia kuhuna ki te ataata:
 - He ataata, he kiriata kua hopukina e ngā ākonga
 - He whakaahua kāmera
 - He tuhituhi
 - He mahi toi kua hangaia e rātou.
- Ka waihanga papapaki anō ngā ākonga mō ā rātou ataata. Mā konei e mōhiohia ai he aha ngā mea hei mahi mā rātou i tēnā wāhanga, i tēnā wāhanga o te ataata. Whakamahia te tauira papapaki A3, ina hiahiatia: PAPAPAKI-A2.PDF.
- Ka whai haere te rōpū i te papapaki, ka kohikohi, ka whakatika/whakapaipai i ngā āhuatanga ataata me ngā āhuatanga oro.
- Ka noho tōpū te akomanga ki te mātakitaki i ngā pakipūmeka. Mā te pouako e whakahaere tētahi 'wānanga' e noho tahi ai ngā kaihanganga kiriata me te hunga mātakitaki, he tuku pātai, he whakautu pātai mō ngā pakipūmeka te mahi. Whakatūria
- he taiopenga kiriata, ka pōhiri ai i ngā whānau, i te iwi kāinga, i ētahi kaumātua rānei kia haere ake ki te mātakitaki i ngā pakipūmeka.

² Rawinia Higgins rāua ko Paul Meredith. 'Te mana o te wāhine – Māori women - Waiata, karanga and whaikōrero', Te Ara - the Encyclopedia of New Zealand, updated 30-May-14

Papapaki

Ingoa:

1	2	3	4
5	6	7	8
9	10	11	12

He Huatau Aromatawai

E āhei ana te ākongā:

- Te kōrero mō tētahi wāhine tito mōteatea rānei o tōna ake iwi, e ora ana i te 100 tau, nui ake rānei ki muri.
- Te rangahau, te whakaatu pārongo mō Puhiwahine, mō tētahi wāhine tito mōteatea rānei o tōna ake iwi, e ora ana i te 100 tau, nui ake rānei ki muri.
- Te mahi tahi ki ētahi atu ki te hanga “ataata puoro” mō tētahi mōteatea.
- Te whakaputa whakaaro, te whakarongo hoki ki ngā kōrero a ētahi atu mō ngā whakaaturanga ataata.

Waiata Aroha



Te Whāinga Matua

Ka whakaarohia te mōteatea nei, a *Ka Eke ki Wairaka*.

Ngā Koronga Ako

E ako ana te ākongā/mātou:

- Ki te whakawhanake whakaaro o roto mai i te waiata aroha *Ka Eke ki Wairaka*, e pai ai te waihanga whakaari.
- E pēhea ana te āhua o ngā kiripuaki, ā, he aha ngā momo kōrero tērā ka puta i ō rātou waha.
- Ki te whiriwhiri he aha ngā rerekētanga ka hua ake mehemea i pā aua āhuetanga i ētahi takiwā rerekē – hei taurā, i ngā 1840, ināianei, ā, hei ngā rā e tū mai nei.

Waiata Aroha

Ngā mea e hiahiatia ana

- he mīhini whakatangi kōpae
- He tāruatanga o KA EKE-MEI RAHI-A3.PDF (kia 1 mā ia tokorua)
- *Ko Wai – Ka Eke ki Wairaka* – te mōteatea tāoreore, te kōnae oro rānei

Ngā mahi

- Ka whakarongo ki te waiata aroha, *Ka Eke ki Wairaka*. Whakamahia KA EKE-MEI RAHI-A3.PDF, ā, ka pānui i ngā kupu o te waiata Mei Rahi te Kiore, nā Mahutu Te Toko i tito.
- Matapakia ngā waiata e rua. Whakamāramahia:

I titoa e Puhiwahine te waiata aroha nei mō Mahutu Te Toko, o Tainui waka. He whaiāipo rāua, engari kāore ngā tungāne o Puhiwahine i whakaae kia piri tahi rāua. Nō reira, i whakahokia a Puhiwahine e ōna tungāne ki Taupō. I ngau kino nei te aroha i roto i a Puhiwahine, ka titoa e ia tāna waiata aroha, a *Ka Eke ki Wairaka*.

- Tukuna ngā ākongā kia waihanga whakaari. Tokowhā ngā ākongā ki ia rōpū whakaari – ko Puhiwahine, ko ōna tungāne, ko Te Toko ngā tāngata e whakaaringia.
- Ko tā te pouako mahi, he āwhina ki te whakamārama i te ngako o te waiata me te āta ārahi kia puāwai mai te auahatanga o ngā ākongā.

Hoatu ēnei tohutohu kaiwhakaari ki ngā ākongā:

- Ko Puhiwahine koe. E pīrangī ana ō tungāne kia wehe kōrua ko Te Toko, kia whakahokia koe ki te kāinga, ki Taupō. Kāore koe i te pīrangī hoki atu ki reira.
- He aha ētahi o ō kupu akiaki, ō kupu inoi atu ki ō tungāne kia noho tonu mai koe?
- Ko ngā tungāne o Puhiwahine e kaha akiaki ana i a ia kia hoki atu ki te wā kāinga i tō rāua taha. Tērā pea ka kī atu rāua kāore te whānau i te wā kāinga e whakaae ana kia piri atu ia ki a Te Toko, nā te mea he whanaunga tata rāua.
- Ka kī atu anō pea ka rīria rātou katoa e tō rātou pāpā ki te kore a Puhiwahine e whakahokia atu ki te wā kāinga. Ka ara ake pea he pakanga i waenganui i ngā iwi e rua.
- Ko Te Toko tērā e inoi ana pea ki ngā tungāne kia tukuna a Puhiwahine kia noho tonu ki waenganui i tōna iwi ake, mā rātou o Ngāti Maniapoto a Puhiwahine e manaaki. Ka kī pea ia he nui nō tōna aroha ki a Puhiwahine, e kore rawa ia e tūkinō i a Puhiwahine, e takahi i te mana o Ngāti Tūwharetoa.
- Kia reri rātou, ka whakaari mai ki mua o te akomanga katoa.

Kupu Tāpiri

- Ka taea pea e ētahi rōpū te whakaari mō ngā rā o mua, e ētahi te whakaari mō ngā rā o 2016.

He Huatau Aromatawai

E āhei ana te ākongā:

- Te mahi ngātahi ki ētahi atu ki te tuhi, ki te hiki i te whakaari ko te kōrero o Puhiwahine rāua ko Te Toko te kaupapa.

Ka Eke ki Wairaka

Nā Puhīwahine i tito

Ka eke ki Wairaka ka tahuri whakamuri
Kāti ko te aroha te tiapu i Kakepuku
Kia rere arorangi te tihi ki Pirongia
Kei raro koe Toko taku hoa tungāne

Nāku anō koe i huri ake ki muri
Mōkai te ngākau te whakatau iho
Kia pōruatia e awahi ā-kiri ana
Kotahi koa koe i mihia iho ai
Ko taku tau whanaunga nō Toa i te tonga
Nō Mania i te uru ka pēa tāua
I ngākau nui ai he mutunga mahi koe

Kāti au ka hoki ki taku whenua tupu
Ki te wai koropupū i heria mai nei
I Hawaiki rā anō e Ngātoroirangi
E ōna tuāhine Te Hoata Te Pupū

E hū rā i Tongariro, ka mahana i taku kiri
Nā Rangī mai anō nāna i mārena
Ko Pihanga te wahine ai ua ai hau
Ai marangai ki te muri e
Kōkiri

He whakamāramatanga:

- 1 Wairaka Ko Ōwairaka te wāhi i okioki ai rātou ko ōna tungāne i te hokinga atu ki Taupō. I titoa e Puhīwahine tana waiata aroha ki reira.
- 2 Kakepuku He maunga kei te tapa o te repo o Kawa, e tata ana ki Te Awamutu.
- 4 Toko Ko tētahi ingoa ko Te Mahutu, he rangatira nō Waikato, nō Ngāti Maniapoto.
- 9 Toa Ko Ngāti Toarangatira.
- 10 Mania Ko Ngāti Maniapoto.
- 10 Pea Mai i te kupu Pākehā 'pair', arā, ka 'piri tahi' rāua.
- 14 Ngātoroirangi Ko te tohunga nui o runga i a Te Arawa waka.
- 15 Te Hoata, Te Pupū Ko Te Hoata rāua ko Te Pupū ngā tipua o ngā tuāhine o Ngātoroirangi. I a ia i mate ai i te mātaotao me te huka i runga o Tongariro, ka karanga atu a Ngātoro ki ōna tuāhine, ki a Kuiwai rāua ko Haungaroa, kia heria mai te ahi tipua i Hawaiki, hei whakamahana i a ia; koia ngā puia me ngā waiariki koropupū.
- 18 Pihanga He maunga kei Tokaanu, i Taupō, e kīia ana i tautohetia e ngā maunga nunui e Taranaki, e Tongariro, ā, riro ana te maunga wahine nei i a Tongariro. Ko te Pukerōnaki tā rāua tamaiti.

Mei Rahi te Kiore

Nā Mahutu Te Toko i tito

Kei te whai mai nei ko tētahi wāhanga noa iho o te waiata aroha a Te Toko,
hei waiata pōtaka te rangi o te waiata nei.

Mei rahi te kiore
Kua eke atu au
Hei hari atu ki te kōtiro
E kai rā i roto
U – te kōtiro
Ka haere atu au
Ka heru i taku pane
Kia pai au ki te kōtiro
E kai rā i roto
U – te kōtiro
E rere te kāhu
Whakatopa i te roto
Ārohirohi ki te kōtiro
E kai rā i roto
U – te kōtiro
Mei rahi te kiore
Kua eke atu au
Hei hari atu ki te kōtiro
E kai rā i roto
U – te kōtiro

He whakamāramatanga:

4	E kai rā i roto	ka ngaua te ngākau e te maumaharatanga
7	pane	he kupu anō mō te upoko, mō te makawe
12	whakatopa	he rere kau
13	ārohirohi	te mau tonu ki te wāhi kotahi i te rangi i te tino tere o te papaki o ngā parirau

Te Whakapapa o Ngātoroirangi



Te Whāinga Matua

E ako ana i te whakapapa o Ngātoroirangi.

Ngā Koronga Ako

E ako ana te ākongā/mātou:

- I te kōrero o Ngātoroirangi.
- Ki te whakamau i ngā whakapapa o Ngātoroirangi ki ōna mahara, me te taki i aua whakapapa.

Te Whakapapa o Ngātoroirangi

Ngā mea e hiahiatia ana

- He tārua o TE KĀWAI WHAKAHEKE.PDF (kia 1 mā ia tokorua)
- Ngātoroirangi – http://www.hana.co.nz/he_puia_he_iwi/n1main.html
Te pukapuka rānei, Ngātoroirangi, nā Hēmi Te Peeti, nama take 10789.

Ngā mahi

Ko Ngātoroirangi te tupuna nāna te wai koropupū i heri mai i Hawaiki. Ko ia hoki te tohunga o Te Arawa waka. He tino tupuna a Ngātoroirangi o ngāti Tūwharetoa.

- Panuihia te kōrero mō Ngātoroirangi
http://www.hana.co.nz/he_puia_he_iwi/n1main.html
- Tapahia ngā kāri ingoa tūpuna (TE KĀWAI WHAKAHEKE.PDF), ka rau atu ki roto ki ngā kōpaki, kotahi te kōpaki mā ia tokorua.
- Mā te pouako te whakapapa e taki, mā tēnā, mā tēnā tokorua e whakaraupapa kia tika ngā ingoa. Ina kitea e te pouako kua tika te raupapa a te katoa, ka mahi ngā ākongā kia mau ā-hinengaro i a rātou te heke whakapapa nei.

Ko Pūhaorangi

Nāna ko Ohomairangi

Nāna ko Ruamuturangi

Nāna ko Taunga

Nāna ko Atuamatua

Nāna ko Rakauri

Nāna ko Ngātoroirangi

Nāna ko Tangihia

Nāna ko Tangimoana

Nāna ko Kahukura

Nāna ko Rangitakumu

Nāna ko Mawakenui

Nāna ko Mawakeroa

Nāna ko Mawaketaupō

Ka moe i a Haahuru

Ka puta ko Tūwharetoa

- Ka whakatīrangohia e tētahi ākongā ngā kāri ingoa, mā tana hoa e whakaraupapa, ā, mau noa te heke whakapapa.

He Huatau Aromatawai

E āhei ana te ākongā:

- Te whakamau i te whakapapa o Ngātoroirangi ki ōna mahara, me te taki i aua whakapapa.

Te kāwai whakaheke

Ko Pūhaorangi
Nāna ko Ohomairangi
Nāna ko Ruamuturangi
Nāna ko Taunga
Nāna ko Atuamatua
Nāna ko Rakauri
Nāna ko Ngātoroirangi
Nāna ko Tangihia
Nāna ko Tangimoana
Nāna ko Kahukura
Nāna ko Rangitakumu
Nāna ko Mawakenui
Nāna ko Mawakeroa
Nāna ko Mawaketaupō
Ka moe i a Haahuru
Ka puta ko Tūwharetoa

Waiariki



Te Whāinga Matua

E tūhura ana i ngā wāhi o Te Puku o te Ika kei reira ngā ngāwhā, ngā waiariki, ngā puia.

Ngā Koronga Ako

E ako ana te ākongā:

- Ki te tautohu i ngā wāhi o Te Puku o te Ika kei reira ngā ngāwhā, ngā waiariki, ngā puia.
- I te wāhi ki ngā tuāhine o Ngātoroirangi, ki a Te Hoata rāua ko Te Pupū, i tae mai ai te ahi tipua ki ngā maunga tapu kei te taha tonga o Taupō-nui-a-Tia.
- Ki te whakahaere mātakitanga pūtaiao i ngā whakamātautau ka kawea ake e ia.
- Ki te āta whakamahi i te reo whakaahua i a ia e kōrero ana mō ana mātakitanga.
- Ki te whakawhiti tahi i ōna whakaaro pūtaiao me ōna hoa.
- Ki te whakamahi i ngā kupu me ngā kōrero e hāngai ana ki te horopaki.
- Ki te whakaatu o ōna kitenga ki te akomanga.

Waiariki

Ngā mea e hiahiatia ana

- He pikitia o te mahere whenua o te ao
- He tārua o TE AU MOKO-A5.PDF (kia 1 mā ia ākongā)
- *Ngātoroirangi* – http://www.hana.co.nz/he_puia_he_iwi/n1main.html
Te pukapuka rānei, ngātoroirangi, nā Hēmi Te Peeti, nama take 10789.

Ngā mahi

Te Hoata rāua ko Te Pupū

Nā Te Hoata rāua ko Te Pupū te waiariki me te ngāwhā, te puia me te pōhutu i kawē mai i Hawaiki hei whakaora i a Ngātoroirangi. Ka mihiā rāua e Puhiwahine i roto i tana waiata.

Ki tā ngā kaipūtaiao, ko te mahi a ngā nukupapa tērā e ngunguru ai te whenua, e pahū mai ai he puia, he ngāwhā. Ko te wera o te nukuratarata i raro i te kirinuku o Papatūānuku e pana whakarunga ana, ā, ko ngā tūtakitanga o ngā nukupapa ngā tino wāhi e kaha puta mai ai ngā puia, ngā waiariki me ngā rū whenua.


- Tohaina ki ngā ākongā te mahere o Te Ika a Māui (kei TE AU MOKO.pdf).
- Ka pānuhia ngā whiti o *Ngātoroirangi* (whārangi 13–16) e hāngai ana ki te huarahi i whāia e Te Hoata rāua ko Te Pupū kia tae atu ai rāua ki a Ngātoroirangi.
- Ka āta tuhia e te ākongā ngā wāhi i whakahuatia ki te mahere, me ētahi atu wāhi e mōhio ana rātou kei reira he puia, he puna waiariki rānei. Ka tapaina aua wāhi ki te mahere.
- Ka whiriwhirihia he tohu, he tae mō te au moko, mō te pōhutu, mō te ngāwhā, aha atu, aha atu hei 'kī' mō te mahere.
- Mā te Ipurangi, mā ētahi pukapuka mahere whenua rānei ngā ākongā e āwhina.
- Kātahi ka tirohia te au moko o te whenua kei te pukapuka *New Zealand Historical Atlas*.
- Matapakia ō rātou whakaaro mō *te au moko o te whenua*.

Kupu Tāpiri

nukuratarata – mantle

kirinuku o Papatūānuku – Earth's crust

Te Au Moko



Te Puia

Ka tūhuratia ngā āhuatanga pūtaiao o te pōhutu, mā te kawea ake i ētahi mahi ā-ringa. Ko tētahi o ngā āhuatanga pūtaiao matua o te pōhutu, ko te pēhitanga. E arotahi ana ēnei whakamātautau ki tēnei mea te pēhitanga, me tōna pānga ki ētahi atu hanga.

Te Pēhanga Wai i roto i te Pātara

Ngā mea e hiahiatia ana

- Te wāhi horoi maitai, he tāpu rānei (kawea rānei te mahi ki waho)
- He pātara pūataata 2L te kītanga
- He pine kōnui, he pāoka taratahi rānei
- He kōrere
- He ipu wai

Ngā mahi

- Ki te pine kōnui, werohia atu he kōhao iti ki te taha o te pātara – ki tētahi wāhi āhua 10cm i runga ake i tōna takere.
- Tangohia te pine kōnui. Ringihia atu he wai ki te pātara. Kia piki te wai ki runga ake o taua kōhao, ka kite koe i te wai e āta māturu mai ana i te kōhao.
- Ka haere tonu te riringi atu i te wai ki te pātara. Ko te nui atu o te wai e tāpiria atu ana, ko te kaha ake te rere mai o te wai i te kōhao.
- Waihoki, kia pau haere te wai, ā, ka heke haere te wai i te pātara, ka ngoikore haere anō te rere mai o te wai i te kōhao.
- Pātai atu ki ngā ākongā he aha i pēnei ai.

Ko te nui ake o te wai i te pātara, ko te nui atu o te pēhitanga, i tere ake ai te puta o te wai i te kōhao.

He Poihau Whakangā

E whakaatu ana te mahi nei, ina kotēhia te pātara, ko te pēhitanga o roto e pana ana i te hau o roto i te pātara ki te wāhi kotahi e wātea ana, arā, ki te poiha.

Ngā mea e hiahiatia ana

- He pātara wai kirihou kua kore te wai o roto
- He poiha

Ngā mahi

- Whakamaui atu te waha o te poiha ki te waha o te pātara. Kotēhia te pātara kia tū mai ai te poiha.
- Ka mahi takirua ngā ākongā ki te whiriwhiri i te whakamārama mō tēnei tūāhua.

Te Whakakī Poihau i Roto i te Pātara

Ngā mea e hiahiatia ana

- Ētahi pātara kirihou 1L, 2L rānei te rahi (1 mā ia ākongā)
- Ētahi poihaū (1 mā ia ākongā)
- He pine kōnui, he paoka taratahi rānei
- He kutikuti

Ngā mahi

- Ka mahi takirua ngā ākongā. Ka werohia he kōhao ki te takere o tētahi o ngā pātara.
- Ka kuhuna ngā poihaū ki roto i ngā pātara e rua. Ko te waha o ia poihaū, ka whakamaūa anō ki te waha o te pātara, mai i roto.
- Ka mahi tētahi ākongā ki te pupuhi atu i te hau ki roto i te poihaū he kōhao kei te tou o te pātara.
- Kātahi ka mahi tērā atu ki te pupuhi atu i te hau ki roto i te poihaū kei te pātara kāore he kōhao i tōna tou.
- Ka kite ngā ākongā, ko te pātara whai kōhao, he māmā te whakakī i tōna poihaū ki te hau. Engari ia, ko te poihaū kāore he kōhao, e kore pea e taea tōna poihaū te whakakī ki te hau.
- Pātai atu ki ngā tokorua he aha i pēnei ai.
- Matapakia tēnei mea te nekehangā, te rironga o tētahi mea ki wāhi kē. I te pātara whai kōhao, kua pai te neke/riro o te hau i roto kē i te pātara ki waho (mā te kōhao), e pai ai te uru atu o te hau hou (i te waha o te kaupupuhi). Engari i te pātara kōhao kore, kāore te hau o te pātara e riro ki wāhi kē, ā, me tino uaua ka uru he hau atu anō ki roto i te pātara mā te pupuhi hau atu ki te poihaū.

He Pahūtanga Pēke Pepa

Ki waho tēnei mahi kawea ai.

Ngā mea e hiahiatia ana

- He pēke pepa
- He ¼ kapu puehu parāoa

Ngā mahi

Ka raua atu te puehu parāoa ki te pēke pepa. Āta pupuhia atu he hau ki roto i te pēke, me te mea nei he poihaū.

- Whakawhāitihia te kakī o te pēke, ka āta pupuri kia kore ai te hau me te puehu parāoa e puta. Pākia te pēke ki tērā atu ringa, kia pahū ai te pēke. Ka aha te puehu parāoa?

Nā te papaki o tō ringa i te pēke, ka pēhia ngā hau o roto i te pēke, e pahū ai hoki ngā mea i roto i te pēke – te hau me te puehu parāoa. Koia i rere whānui ai te puehu parāoa ki te takiwā.

He Hanga Pōhutu ki te Mentos me te Diet Coke

Me mahi anō tēnei ki waho, ka mutu, mā te pouako pea e mahi, hei mātakitaki mā ngā ākonga, i te mea he nui te utu o ngā rare nei me te coke. He tino pai hei whakaatu i te wāhi ki te tauhohenga matū e nui haere ai te pēhitanga.

<https://www.youtube.com/watch?v=ZwyMcV9emmc>

Ngā mea e hiahiatia ana

- He pātara Diet Coke 2L
- Tētahi pākete Mentos (he pākete rango nei te hanga)

Ngā mahi

- Kia tere tonu te tuku atu i ngā Mentos katoa o te pakēte ki roto i te pātara Diet Coke. Ina mutu, e neke koe ki tawhiti, ka mātaki ai i te pōhutu autaia tonu te rahi!
- Ka whiriwhiri ngā ākonga he aha i tū mai ai te pōhutu. Ka whakawhiti whakaaro tahi me ērā atu o te akomanga.
- Ka tukua pea ngā ākonga kia paku whakarerekē i te whakamātautau, hei tauira:
 - whakamātauria ētahi atu momo waireka mirumiru
 - whakarerekētia te rahi o ngā mentos
 - whakarerekētia te momo mentos, te momo rare rānei
- Ka tuhia ngā hua ka puta, ā, ka whakatairitea ngā kitenga.
- He pai tonu kia hopukina ngā tauhohenga ki te kiriata, he huarahi pai hei whakaatu i ngā āhuetanga i pā ki ētahi atu.

He Huatau Aromatawai

E āhei ana te ākonga:

- Te tohutohu i ngā wāhi o Te Puku o te Ika kei reira ngā ngāwhā, ngā waiariki, tae atu ki ngā puia.
- Te whakamārama i ētahi āhuetanga o te ahi tipua i ngā maunga e tata ana ki Taupō-nui-a-Tia.
- Te tāpae whakaaro mō te wāhi ki te pēhitanga me te tauhohenga matū e hua ake ai he pahū.